

欽  
定  
全  
唐  
文

欽定全唐文卷二百十五目錄

陳子昂

七

梓州射洪縣武東山故居士陳君碑

臨邛縣令封君遺愛碑

九隴縣獨孤丞遺愛碑

漢州雒縣令張君吏人頌德碑

續唐故中岳體元先生潘尊師碑頌

昭夷子趙氏碣頌

唐故循州司馬申國公高君墓誌

申州司馬王府君墓誌

欽定全唐文卷二百十五

陳子昂

七

梓州射洪縣武東山故居士陳君碑

君諱嗣字宏嗣其先陳國人也漢末淪喪八代祖祇自汝南仕蜀爲尚書令其後蜀爲晉所滅子孫避晉不仕居涪南武東山與唐胡白趙五姓置立新城郡剖制二縣而四姓宗之代爲郡長蕭齊之末有太平者兄弟三人爲郡豪傑梁武帝受禪網羅英豪拜太平爲新城郡守尋加本州別駕弟太樂太蒙蒙爲黎州長史都督護南梁二郡太守

樂爲本郡司馬即君之高祖父也生曾祖方慶好道不樂爲仕得墨子五行祕書而隱於武東山生烈祖湯湯仕郡爲主簿遇梁季喪亂避時不仕生皇考廣迴迴早卒君即迴之第二子也少孤而有純德恭已飾行一日三省家代本以清白崇德迨君之孤素業空矣君有仁兄養母以孝君克順至行同勤苦節夏不避暑冬不避寒蒸蒸服事行年四十有五入則孝出則弟謹而信汎愛衆而親仁無餘力也以是不憂於道逮親終歿春秋已高從事不可以養矣乃輟干祿之學修養生之道山壑高居農野永歲雅聞

漢有王丹者故居不仕家累千金以自奉田稼勤者載酒  
肴從之鄉里承化以相懲沮乃歎曰彼王丹者是爲政矣  
奚其爲政也由是始攷林澤闢良田習山書務農政天道  
時變地道化成邱陵泉藪星歲雲物靡不用心也原田莓  
莓黍稷漠漠汶陽之稼如雲矣春日載華歲聿其秋白露  
時降百穀收熟君常乘肩輦省農夫饋田畯刑以肅情悅  
以勞勤若孫吳之用兵驚鳥之搏擊也卓彼甫田歲取十  
千倉庫實崇禮節恤惻寡賑窮乏九族以親之鄉黨以歡  
之居十餘年家累千金矣其鄰國有媮衣食帶刀劍推埋

胠篋之類鬪雞走狗之豪莫不靡下風馴素節曰里有仁  
焉吾何從之也遂頓浮窳之節肅恭儉之規修孝悌飾廉  
恥將欲效君之素業也君時年已耳順素無經世之情林  
園遺老元默忘歲遂保先君武東山之故居行不由徑非  
公事未嘗至於州縣也昔襄陽有龐德公谷口有鄭子真  
東海王霸西山蜀才皆避人養德退耕求志軒冕不可得  
而羈憂患不可得而累逮於我君作者五人矣於戲古者  
至人不利苟得不務近貴量腹而食度身而衣非其道萬  
鍾不足豐也非其榮五鼎不足飪也躬勤耕稼植其杖而

耘不荅子路之問者豈我君之徒與縣縣羅網冥冥高鴻  
趯趯竹竿穆穆幽龍其與禍敗之遼絕如胡越哉然則兩  
龔不免於蘭焚二老不免於薇歎其近貴利邪夫上無憂  
悔下無飢寒含道以制嗜慾達命以順生死仁以愛身智  
以養德俾爾耆而艾俾爾昌而熾君子保之以永壽考非  
我君者乎享年八十有五太歲壬辰五月十三日考終厥  
命臨終戒曰啟子足啟子手吾聞古人有言珠玉而瘞之  
是暴骸於中原也古者不封不樹後代聖人易之以棺槨  
吾不敢違聖人可具棺槨而已斂以常服墳無邱隴吾將



庶幾以奉先人之清業也有子某等皆能祇奉遺訓聿從  
先志長壽二年龍集癸巳某月某朔日元月載踰卜兆時  
吉始啟殯昭告奉遷於舊塋武東山之陽禮也鄉里會葬  
者千餘人皆涕泣號慕悲純德之不見咸曰君子沒矣仁  
何以名陵谷不朽匪唯頌聲小子不敏謹述鄉人之教其  
詞曰

肅肅我祖國始於陳中裔淪喪泊此江濱山川隆鬱旂鼎  
氛氲生我君子於鑠元真惟孝肅悌惟仁善鄰樂我耕稼  
忘我搢紳茫茫田藪歲也其春農人肅事君子犒勤孰爲

夫子植杖而耘弋者何慕鴻飛高雲楚狂懼殆夷叔求仁

良時

一作圖

終矣不考於身我異於是非隱非淪撫化隨運

安排屈伸大年旣沒長夜何辰聖達不免宇宙同塵桐棺  
三寸豈我窶貧自古有死吾從聖人嗟爾百代子子孫孫  
驕奢自咎天道無親思我松柏恭儉是遵

臨邛縣令封君遺愛碑

敘曰蒼生蚩蚩其動也直蓋顓蒙乎聖人顓顓其汲也教  
務皇中乎則時至其理樹之君公弼其機馭之師之疑非  
能駿尊上帝保乂黎元誰則荷天之寵折人之爵行其禮

樂驟觀於中和裕其廉平載聞於謠誦我之遺愛者不從事於是邪嘗試論之公名某字某渤海蓆人也昔后稷有德於邵文王受圖於鎬珍符冊命始自於西周珪社建侯奄荒於東土裘鼎軒冕有家代焉曾祖子繡齊潁川渤海二郡太守霍州刺史隋通直郎通州刺史榮分麾蓋道邁循良時雨洽於齊陳惠風被於唐楚祖德於北齊著作郎隋扶風郡南陽縣令芸局一作編觀奧見天下之圖石柱聞琴知君子之化父安壽皇朝尚衣直長懷州司馬豪一作豪州刺史湖州刺史良二千石聞乎共理之尊肇十二州榮

多刺舉之首公則使君第某子也冲和誕命光大含章實公侯之子孫有山河之氣象明不外飾默昭於元機敏實內融養蒙於用晦故其廉不直物恕不由衷崇善足以利仁自彊足以從事有朋友之信焉有閨門之肅焉非夫恭人其孰能景行行之者也年始若干爲國子生言從太學之遊以觀先王之道某年以明經擢第解褐守恒州參軍秩滿補許州司法參軍許惟舊國陳實多巫君子豐明利用乎獄載以課最累加秩焉又轉洺州司兵參軍叢臺袪服一旦成市非利器者政以多荒公實佐之官無留事信

矣乎能其理者有其任濟其業者享其功我豈蒙求物思其理某年選補臨邛縣令夫蜀都天府之國金城鐵冶而俗以財雄弋獵田池而士多豪侈此邦之政舊難其人公按轡清途下車而宰覽其謠俗永歎於良圖想其風流慨然於惠化以爲太上之理因人者也通變之機隨時者也必使無訟不亦由吾用乎利貞夫何在物於是謀其教令肅其儀刑敬其事以順其人正其文以利其義以爲昔者聖人之務本也在乎稼穡有稼穡然後可以養人故公之勸人也用天之道分地之利以爲昔者聖人之利用也實

在財貨有財貨然後可以聚人故公之化居也貿遷有無  
和其衆寡以爲昔者聖人之事生也謹其制度然後可以  
富故公之節用飲食有節車服有數以爲昔者聖人之事  
死也慎其喪祭有喪祭然後可以睦人故公之送死也葬  
之以禮祭之以禮以爲昔者聖人之用獄也崇其法制有  
法制然後可以禁人故公之恤刑也唯齊非齊有倫有要  
夫如是者豈苟其利哉唯欲潔乎其源正乎其本慎之於  
謀始要之於用終將使斂歟矯虔而是以息孤寡不穀而  
是以寧者哉夫然後磨之以仁琢之以義使男女異路班

白不提熙乎其若春肅乎其若神然後文以禮樂幾乎以  
淳樸道豈遠乎嗚呼昊天不悅降此荼毒某年以太夫人  
憂去職於時公之蒞始逾年矣然三載考績是用未成百  
姓哀惶人吏嗟咨咸云我父去矣而人悴矣鄉望老人前  
某官等五百餘人或金隄之秀玉宇之英並服美於寬允  
嚴祗於教義遂走之州府訴之上官冀奪其哀摧禮終秩  
不謀而同者日有百數司馬元公帝王之裔也康歌協化  
盛德在人憫烝庶之求思嘉我君之懿績以爲古之借寇  
者何以踰是哉遂用疇咨舊章允懷毗誦奪之公禮上之

於文昌臺非將協贊天工慰彼黎庶君子之教而日見之  
哉班白之老胥吏之徒又以天子在宸勤慈孝理我君云  
邁誰其嗣之千餘人復連表詣闕投匭乞君以墨纓從事  
遑遑焉若有望而未至也鬱陶增思寤寐永歎將欲思慕  
不朽想見懿德乃相與言曰昔者君子思其人而愛其樹  
蒙其澤則歌其詩封君之仁我無金石乎又述其行狀訪  
余以銘勒之事縣丞等有弼諧之美刀筆之能永思清風  
歎息仁化尉安定梁慎盈知名之士也墨妙幾於草聖文  
義總於辭雄昔仕京畿左遷此職自以爲贊封君之化有



日矣承封君之德有年矣夫其忠信之教寬猛之機古之  
官人君其殆庶乎父老之請允矣余竭來舊國傳據其實  
恭聞其去思而親覩其遺愛余所備者敢述斯文猶懼後  
生有言以爲口實河東薛稷隋內史公之孫也文章之伯  
而時所宗故憑其實錄寄之爲頌其詞曰

天地之間有渤海焉伯宗伯谷神山在焉精氣飛騰生良  
宰焉良宰實生代祿代卿君達好道風雲上征武興察孝  
州郡有聲陳其弓冶戴其簪纓筮仕斯邑我龜觀貞深期  
高悟絕策遠明旣至肅肅其來英英臨事若祭視人如嬰

三農憊困折獄以情輕重共用穀貨以平我裳旣襲我簋  
斯盈於惟我君張仲孝友家膺五福堂享三壽溫清不違  
喜懼兼守枯魚銜索疾風過牖匪降自天誰執其咎棘心  
劬勞匪莪伊蒿彼蒼不弔惟其永號借寇爲請惠此嗷嗷  
曾是奔告謂天蓋高昇仙橋下赤車使者客於臨邛文雅  
雍容觀風萬里謁帝九重嗟嗟其舊椎牛擊鍾門於君墨  
借翰雕龍專思君兮不返伐石登山山高兮望遠懷車馬  
於言告欲絃歌於言偃人實去思我無愧詞

九隴縣獨孤丞遺愛碑

彭州九隴縣丞獨孤君有恭懿之行柔毅之才臨官以莊敬事而信清白苦節勤恪厚躬廉而不矜利以不浼有特立之操焉在位四年無一日自倦精專力務澤潛氣通天彭之人陶然大化居秩歲滿單車告歸邦思其仁國詠遺愛乃樹碑刻石追崇厥庸旣頌歎之又思福之以金仙世尊慈善萬物遂貢金鑄像祈祉冥休悠悠之人至今稱賴夫官不必貴政惟其才獨孤丞上迫宰君下雜羣尉文墨教令不專在躬然力行務仁推誠愛物謳吟者不歌其宰頌議者必歸於丞豈欺也哉吾每聞一言可以永寧天下

者在能官人而已苟謬其任綱維以積感獨孤丞智效一鄉惠孚百里況其次者乎於戲官人哉乃作頌曰

於維國家建官以理得人則盛匪人則圯英英我君清節素履恭寬敏惠將順其美禮實在躬人以知恥歲秩其暮薄言歸止祁祁吏人何嗟及矣涕戀沱若遺愛罔已瞻德樹碑造真祈祉不有其惠孰能享此悠悠彭門千載有紀

漢州雒縣令張君吏人頌德碑

至哉天子在穆清之中端元默之化萬國日見百姓以親誰其昭宣令長其任也然則國有小大政有污隆遭其和

平則循理之功易值其凋瘵則革弊之業難況罹乎薦瘥  
救其塗炭力倍於中而功不半之利盡其仁而澤未全洽  
則我府君當欽明之世承苛慝之燼緝積靡之餘遂能撫  
寧矜殘淳耀敦懿改制立憲昭德顯仁奇跡光乎曩賢惠  
風穆於茲日我行千里而得一賢傳曰夫用我者而豈徒  
哉府君姓張氏名知古蓋漢少傅留侯之裔也昔留侯得  
滄海力士東報於秦遇黃石老人西歸於漢山河鍾鼎子  
孫保之代在關中今爲宜州人也高祖藝周恒州司馬曾  
祖歡隋許州司馬祖雄唐并州榆次令考琳原州平原令

皆稟瑚璉之器著經濟之才大位不躋元德滋茂其昭祉  
復襲於我府君府君體英奇之姿冲希默之量齊敏內肅  
端簡外融夫其孝友睦婣研幾成務深斷守節之固撥煩  
簡要之能在於家邦聞其政矣起家補同州朝邑尉歷太  
州鄭縣尉左金吾衛倉曹參軍洛州洛陽主簿黃圖左翊  
豪俠所湊赤墀佐理實賴其能又遷雍州明堂縣丞時皇  
帝恭默明臺清問下吏西南矜寡有詞上官曰刺史沓貪  
而苛縣令威施而忍奸宄因豐羣行斂敷哀哉毗黎顛在  
荼毒朝廷憫之帝曰俞允哉乃用勅撫此荒邑噫嘻昔者

苛政未作封境保安茲都衝要衿帶全蜀百濮兼錯萬裔  
之泉寶利珍貨盡四海矣迨殘猛聿至蝨賊內訌始於碩  
鼠之侵終屠餓狼之喙杼軸旣盡郛邑殆空悲夫仲尼云  
苛政虐於猛虎豈猛虎而已哉我府君殷然始宣皇明恭  
職事巡省黃髮周爰令圖所以綏亡固存蠲虐去暴與百  
姓更始者輿人斐然乃作誦曰我有聖帝撫令君遭暴昏  
極慘寡紛民戶流散日月曠君去來兮惠我仁百姓蘇矣  
見陽春然不躬不親庶民不信於是府君知人散久矣黷  
於詐罔已曰未遂躬六曹之務先五美之訓下官斂手牟

食革心人始翕如也初官戶在版圖者萬有五千餘家歷政侵殘逃者過半歲月永久廬井湮蕪蠪蛸在堂蟋蟀空歎先是有勅天下逃人歸復舊業者免當年租庸公以柔遠能邇政之大端乃下令曰於戲天子誠憫斯人是用命我其訖有濟若逋不及惠幽不能明吾之罪人部內有逃越他境能相率歸者免一歲租及征徭若惻嫠貧窶不能自濟者當別議優之其長正耆老可明喻此誠使被幽谷令旣下克己示信或有逃者引首而歸公親循寧慰贍理其業於是小大悅賚遠近承風四封諸通一朝景附夫負



妻戴子荷蓑提笠首尾郊郭者凡七千餘家熙乎若鴻鴈  
之得春也旣至矣則勞來之旣止矣則安輯之或三年或  
十年舊館已無喬木猶在公緝屋塗室薶陌開阡爲其井  
疆人得其居矣田畯失業農野榛荒此邦膏腴利在江浸  
有金鴈白魚二水是其朝雲澤麓無虞溝畛填塞公濬其  
塗洳川澮始通人得就畊矣流亡初復貧鞠兼半食不餬  
口力未贍農公又假富資貧耦耕分種助其鉅刈歲以有  
年人得其食矣曩者征稅橫斂商旅不行貿遷有無塵肆  
半絕公阜其貨財交易復通日中噬嗑人得其利矣乃種

樹畜牧蠶漁工賈什伯之器車服之庸婚姻之時喪祭之  
禮莫不盡爲度數制其權衡征賦旣均千室如一於是百  
姓允賴鼓舞而歌其歌詩凡六章題曰逃還樂其首章蓋  
言天子之德也其二章憫前政之虐也其三章喜公惠之  
至也其四章言逃還之樂也其五章美公化行而奸慝不  
興也其六章善政令均平賦斂不淫也時日月會於龍狔  
歲功成平孟冬百嘉備蒸品物咸乂府君乃稽版籍攷幽  
明親巡乎邦廬存問乎鰥耄黃耆稚齒山原之民乃接手  
賡歌迎擁馬首累乎道路者以百千輩晝肆酒夜聯燭羣

舞蹈詠迎途餞郊皆歌前六章慶公惠也是以封內歡康  
境外萌動企公德美有若神明府君嘗因公事至成都成  
都之民駕肩相矚蓋籍甚其異也封人有喪者廬於墓側  
鞠然在疚負土成墳公親從寮吏弔其苦蓆自是禮讓行  
焉學校興焉長史河南竇公旌別尚賢廉簡居政以公甄  
理積弊躋美中和歷政逋亡一朝狎至遂表其狀奏之於  
闕庭屬獫鬻孔亟戎車未暇郊壘旣夷邦憲清穆刺史南  
陽張公憺偉臥理寬猛以濟儒術兼優吏畏獨坐人歌來  
暮甄綜品鑒物無遺才又以公保邦人民勝殘去殺重理

前秩昇聞宸扆夫昇聞者豈循良而已哉蓋激清勵貪聳  
善懲惡祈元嘉命優公寵章於是鄉旄邦彥華髮杼首或  
名淹玉壘家擅銅山如王宏馬靖等若干人皆以政治仁  
顯功著頌宣揚金帛嘉止不日而至至則國肥矣去則民  
瘠矣況我邦族其將疇依兄弟睦親不可以從往也筐篚  
玉帛不足以永貺也隔千里而不昧與百姓而長存非刻  
金石列圖象揚宏懿崇耿光則喁然衆情孰克慰滿於是  
乃從旅鑿巉巖自金水之山得玉玖之石農夫田婦擔扛  
力運皆懼公往遺像莫瞻共琢之磨之議之謀之子昂時

因歸寧采藥岐嶺父老乃載酒邀諸途論府君之深仁訪  
生祠之故事永我以典禮博我以文章夫千里一賢義者  
所貴今百城一理公獨有之不熙其烈光以示當世則孱  
弱者胡以激節貪垢者曷以悛心敢因此義乃吐謠而作

頌曰

頌缺

續唐故中岳體元先生潘尊師碑頌

尊師業尚沖密勤慈幽深理心事天所寶惟嗇絕聖棄智  
不耀其光故真感冥期珍圖祕學性與天道不可得而聞  
也若乃崇標曠迹遐情遠思志摩青雲蓬視紫闥高宗每

降鑾輦親詣精廬尊師身不下堂接手而已每歎曰大丈夫業於道不能投身霄嶺滅景雲林而疲痾此山以煩時主吾之過也遂欲東求蓬萊孤舟入海屬天皇敦篤斯道新款逾深踟躕山隅絕策未往旣而金革

一作格

有命鑣轡

遺區於戲昔姑射有神人堯輕天下崆峒有至道軒屈順風元真高蹤萬古同德何其盛哉尊師有弟子十人並仙堦之秀然鸞姿鳳骨眇愛雲松者惟潁川韓法昭河內司馬子微皆稟訓

一作命

瑶庭密受瓊室專太清之業遺下仙

之傳谷汲芝耕服勤於我蓋歷歲紀也始尊師受籙於茅

山昇元王君王君受道於華陽隱居陶公陶公至子微二  
百歲矣而元標僊骨雅似華陽夫階真蹈冥鍊景遊化者  
其必有類乎法昭等永惟尊師靈跡洞業高深邁古而棄  
代往矣其若之何乃斲石幽山申頌元德其頌曰

觀元化兮求古之列仙得瑤圖與金鼎信元符之自然神  
與道而爲一天與人兮相連苟精守以專密必駕景而凌  
烟丹邱不死兮羨門子黃宮度世兮吾體元體元至德兮  
洵淑美沖心養和保元始初學茅山濟江水乃入華陽洞  
天裏道逢真人昇元子授以寶書青台旨令守嵩陽玉女

峯雲樓窮林今五紀聖人以萬機爲貴而我以天下爲累  
聖人以大寶爲尊而我以天下爲煩是以冥居於隈嵎寄  
遺跡於軒轅有唐高宗今天子之光好道樂仙今思彼雲  
鄉千旌萬騎今翠鳳凰遨遊汝海今箕山陽朝拜白茅夕  
紫房齋心潔意緬相望祈問玉真及玉皇何以得之受天  
昌黃庭中人在子身窅窅冥冥精甚真去汝驕氣與淫神  
勤能思之道自親遂解形而遺世乘白雲而上賓弟子不  
知其所往乃刻石以思其人

昭夷子趙氏碣頌



昭夷子諱元亮

一無亮字

字貞固汲人也本居河閒代爲大儒

至祖掞尤博雅耽道隋徵八學士與同郡劉焯俱至京師  
補黎陽郡長始居汲焉有二子禮興禮輿官至臨潁縣  
丞輿爲校書郎並著名當代昭夷即禮輿季子也元精沖  
懿有英雄之姿學不常師志在遐遠年二十七褐衣遊洛  
陽天下名流翕然宗仰羣蒙以初筮求我昭夷以元轂發  
機故蓬居窮巷軒冕結轍時代議迫阨不容其高乃屈身  
泥蟠求祿下位爲幽州宜祿縣尉到職逾歲默然無言唯  
採藥彈琴詠堯舜而已州將郡守穆然承風君之道標浩

如也因巡田入隴山見烏支丹穴密有潛遁之意蒼龍甲

一作

申歲在大梁遭命不造發瘡疾而卒時四

一作十九

嗚呼哀哉天下士人聞之知與不知莫不爲之垂涕蓋傷其有濟時之量而無長駐之年夫上德道全器無不順中庸以降才好則偏有張也之莊無展也之道好由也之勇緬回也之仁侈宰予之言遺澹臺之行務端木之智忘甯武之愚或正而不奇或達而過雜君獨五味足六氣和通衆賢之不兼暢羣才之大適雖不至於聖道其殆庶乎故人無閒言物飽其義吾嘗論人事有十君得其九一不至

者命也夫於戲名聞天下而不達於堂上智周萬物而不  
適乎一人也其時歟其事歟君故人雲居沙門釋法成嵩  
山道士河內司馬子微終南山人范陽盧藏用御史中丞  
鉅鹿魏元忠監察御史吳郡陸餘慶秦州長史平昌孟詵  
雍州司功太原王適洛州參軍西河宋之問安定主簿博  
陵崔璩咸痛君中天鼎飪不實百代祀德故老或云以爲  
名者德之表諡者行之迹君囊括代道位屯時艱困乎艱  
飢光景不耀乃共稽隲舊行考諡定名問於元著象曰明  
夷于昭夷昔歎才位不兼大運有數嘗哀時命而作頌云

諸公以余從君之遊最久故秉翰參議其頌曰

天道宏運兮物各有時匪時不生匪運不成昔者元精回  
潘陽九滔災大人感生堯禹恢能陰陽旣和元帝傳家五  
百數終桀驚暴邪子乙提運水火革明匪賢不昌尹乃阿  
衡六百運徂受始淫狂西伯考元厯在躬昌匪雄不決匪  
謀不臧姜牙皓眉實逢其良投釣指麾奄有八荒周有天  
下七百餘年太公之後不聞大賢豈無仲尼負道周旋無  
勢一挈無土一塵然則大運之所來時哉時哉時隘業隘  
運巨功巨苟非其時草木爲伍昭夷作頌云爾又嘗著汲

人嚶記言變化之事且曰請爾靈龜永晏息乎浩初

唐故循州司馬申國公高君墓誌

君諱某字某渤海蓊人也昔周天子命我太公受封東海  
鍾鼎寶玉七百餘年故其公侯代有國祀曾祖勵字敬德  
北齊朔州大行臺僕射襲爵清河王改封樂安王周授開  
府隋授楊楚洮三州刺史我唐有命崇寵典章貞觀初贈  
恒定并趙四州刺史垂拱中又贈特進非明德上公孰享  
之哉祖宗儉字士廉皇朝太子太傅上柱國申國公食邑  
三千戶贈司徒并州刺史永徽初贈太尉配享太宗文皇

帝廟庭謚曰文獻昔帝光天下公實佐之至是元勛克配  
清廟父愍字履行秦府軍直千牛滑州刺史將作大匠金  
紫光祿大夫太常卿洪州都督上柱國申國公尚東陽長  
公主駙馬都尉衣冠禮樂盡在是矣故帝乙歸妹尚于中  
行公則駙馬之元子也含章丹穴籍寵黃扉承禮訓於公  
庭盡儀刑於士則年若干嗣封申國公十四解巾授千牛  
備身超奉紫璋已有光矣秩滿補海監府左果毅都尉再  
遷遊擊將軍右師府郎將遂昇榮禁衛承寵司階千廬之  
務式遵八舍之榮攸襲又授朝散大夫尚輦奉御再遷尚

衣奉御屬展宮構難巫蠱禍興坐堂弟岐左遷循州司馬  
蒼梧南極桂海東浮是唯篁竹之區而有山夷之患永隆  
二年有盜攻南海廣州邊鄙被其災皇帝哀洛越之人罹  
其凶害以公名家之子才足理戎廼命專征且令招慰公  
奉天子威令以喻越人越人來蘇日有千計公乃惟南蠻  
不討之日久矣國有大命將布遠方欲巡禦象林觀兵海  
裔彼蒼不弔天我良圖因追寇至廣州遇疾薨於南海之  
旅次時年若干嗚呼哀哉珠鼎之秀邦國之光負才能重  
書劍方將克崇舊業祇寵前人降年不長永墜厥緒嗚呼

哀哉夫人京兆韋氏銀青光祿大夫太子詹事武陽侯琨  
之第某女也有淑慎之德窈窕之賢長於公宮少習婦道  
年十六歸於申國鳳臺尊閔鵲巢斯在雖珠玉翡翠職是  
其儀而澣濯蘋蘩不改其操故我君子琴瑟友之年三十  
儀鳳二年先公而歿其年權殯先塋嗚呼哀哉始公之適  
南裔也夫人逝矣死生言別永懷燕越之悲旌旒同歸終  
淪松柏之路先是公有命合葬宏道歲靈輓自南海還嗣  
子紹等追惟永終仰遵先志輿載初元年歲在攝提格始  
昭啟亡靈改卜遷祔某月日遂合葬於少陵原禮也嗚呼



哀哉霸山南望秦川滿目紫臺鍾鼓方對於青春白楊邱陵獨悲於元夜紹等以東西之人懼岡陵之變古不樹今則墳焉

申州司馬王府君墓誌

君諱某字某其先太原人也昔周文王有聖人之德甲子受圖至我靈王誕膺丕顯太子晉得鳳凰之瑞恭揖羣后上爲帝賓縣縣生人作我王氏迨秦有賁翦并吞諸侯晉有渾祥功格帝室魏至慧龍爲貴種矣十二代祖卓晉常山公主子也始公主湯沐邑在汾陽永嘉淪夷不及南度

因樹粉櫝而結廬焉卒葬於長壽原至今鄉有太原之號  
也曾祖亮周開府儀同上大將軍隋信州刺史樽俎之師  
也祖儉隋離石郡守唐石州刺史贈岳州總管廣武烈侯  
社稷之器也父諡唐虞部郎中荊州大都督司馬商壁鄜  
許冀五州刺史加銀青光祿大夫瀘州都督金水敏侯上  
柱國廊廟之才也敏侯有功於國始賜土田白茅苴之在  
鄆之曲因食菜今爲雍州人君即敏侯之元子炳靈珍粹  
輝采幽黃愿而以恭寬而以栗青衿聞道已光大矣天子  
立太學所以養賢公子齒上庠所以觀國君休烈泉塞志

業雲翔年若干爲國子生其中射策甲科解褐補吳王府  
參軍事時吳王帝之愛子國選英寮君三德允章六行旣  
穆與某郡劉孝孫首先此舉誦詩三百和淑其仁而醴酒  
不恭楚筵亦廢坐除滑州錄事參軍又轉隴州錄事參軍  
時樂成公劉仁軌以宰相之貴持節此州暖然推中主諾  
責下君提綱未幾羣轄載孚劉公坐嘯以爲能也舉遷汾  
州平遙縣令其地有臺駘之怪蟋蟀之人君黃鼎分中鳴  
琴不下鐘鼓旣考風俗允和帝曰良哉而格我政加朝散  
大夫遷岐州扶風縣令昔尹翁歸以文武之幹緝熙此邦

黃圖雖寧赤丸未入君以先庚斷甲設距投鉤赭裾始繩  
聖面咸革丁我敏侯艱遂茹哀苦廬銜恤終祀是歲申國  
不理元寮佇才制加朝請大夫授申州司馬屬太夫人有  
羸老之疾去官不之白華增勤綵衣是慕至於朝盟夕膳  
候色承歡夔夔齋慄蒸蒸不匱有若楚老萊子之爲嬰兒  
也嗚呼昊天不弔降我鞠凶太夫人以眉壽薨時君年已  
七十二矣禮以飲酒而君絕漿虞以降哀而君泣血熒熒  
在疚藥棘其心新穀未升匪莪以殞以某年青龍癸巳薨  
於某里第之正寢孝之終也嗚呼哀哉昔聖人五十而慕

先子謂之至德今君七十二而盡其哀非敦篤允元深仁  
淑德者疇能離此哉夫人宏農楊氏隋內史侍郎丹川公  
演之孫女也幼有淑德而美令儀採蘋昭華穠荷此秀至  
於內嚴閭訓外匡君子麟趾以穆雞鳴有章誠可道暎公  
官事宣彤管晚年以儒因未究冥業惟深遂揭無生之筌  
將遺有漏之屣顓潔道行受蓮花經理極翻三心滅不二  
形亡緣盡歸真化冥歲在丁酉處順而往始我府君以懸  
車之歲從負米之勤夫人亦能肅恭晨昏嚴祗左右夫至  
行莫大於孝崇義莫顯乎忠君克勤於家盡力於國刑於

妻子至於朝廷夫矜而不與物或有違廣而無適義所以  
比君好謙達禮研幾成務摹其法器無不馴從其事政無  
不理夫用我者而豈徒哉嗟夫矜而能廉利而不浼百行  
允備三事不階臧文仲其竊位與柳下惠其直道與有子  
四人長曰某官至武連縣令先公而卒次子某等皆肅奉  
嚴訓景行高山達於家邦光於禮樂永號罔極泣血旻天  
始府君臨終遺令薄葬墨龜未食青鳥不封權殯於某所  
需吉兆也龍集己亥律躔應鍾金雞鳴玉狗吠黃腸密啟  
丹旄徐飛始遷神於某原之陽禮也青龍在左朱鳳居前

雙衾共封二室同宛珠玉不瘞邱隴誰傳刻此金石以旌  
後賢

欽定全唐文卷二百十六目錄

新文藝出版社藏書

陳子昂八

率府錄事孫君墓誌銘

唐故袁州參軍李府君妻張氏墓誌銘

上殤高氏墓誌銘

唐陳州宛邱縣令高府君夫人河南宇文氏墓誌

銘

故宣議郎騎都尉行曹州離狐縣丞高府君墓誌

銘



堂弟孜墓誌銘

周故內供奉學士懷州河內縣尉陳君石人銘

館陶郭公姬薛氏墓誌銘

我府君有周居士文林郎陳公墓誌銘

唐水衡監丞李府君墓誌銘

禡牙文

崇海文

國殤文

并序

弔塞上翁文

祭孫府君文

爲建安王祭苗君文

祭黃州高府君文

祭外姑宇文夫人文

祭韋府君文

祭率府孫錄事文

欽定全唐文卷二百十六

陳子昂八

率府錄事孫君墓誌銘

嗚呼君諱虔禮字過庭有唐之不遇人也幼尚孝悌不及  
學文長而聞道不及從事得祿值凶孽之災四十見君遭  
讒慝之議忠信實顯而代不能明仁義實勤而物莫之貴  
陘厄貧病契闊良時養心恬然不染物累獨考性命之理  
庶幾天人之際將期老而有述死且不朽寵榮之事於我  
何有哉志竟不遂遇暴疾卒於洛陽植業里之客舍時年

若干嗚呼天道豈欺也哉而已知卒不與其遂能無慟乎  
銘曰

嗟嗟孫生人見爾迹不知爾靈天竟不遂子願今今用無  
成嗚呼蒼天吾欲訴夫幽明

唐故袁州參軍李府君妻張氏墓誌銘

夫人諱某清河郡東武城人也昔軒轅錫允弧矢崇威畏  
其神者三百年得其姓者十四族金貂七葉漢天子之忠  
臣鼎足三公晉武皇之名相孤卿玉帛世有其庸曾祖某  
北齊太常卿徐究二州刺史天人之禮位掌於秩宗侯伯

之尊寵優於露冕祖某隋汾陰壽春陽城三縣令襲公侯  
之瑞屈銅墨之班士元非百里之才太邱有三台之望父  
某唐戶部侍郎復毫建三州刺史尚書北斗始贊於南宮  
方岳專城終榮於獨坐夫人即刺史之第若干女也稟柔  
成性蘊粹含章承禮訓於公庭習威儀於壺則夫其窈窕  
之秀婉孌之姿貞節峻於寒松韶儀麗於溫玉鉛華不御  
飾環佩之容浣濯是衣勤黼黻之綵自作嬪於君子主中  
饋於家人三千之禮不違九十之儀無慝至乃恭於奉上  
順於接下仁孝以承宗祀慈惠以睦閨門則雍雍蹒蹒必

由其道矣嗚呼府君不造邁此閔凶中年不圖早世而殞  
青松摧折哀斷女蘿之心丹節孤高終守柏舟之誓而府  
君食先人之德無厚生之財夫人徇黔婁之貞闕丹臺之  
產孀居永日蓬首終年處貧素而彌堅保幽芳而不昧始  
府君之逝有四子焉少遭罔極之哀未奉過庭之訓夫人  
保持名教終始禮經旣勗之以義方又申之以遠大皆能  
率由慈訓克荷嘉聲箕裘之業載隆燕翼之謀不實非夫  
淑明賢懿聖善溫良崇婦道之深規宏母儀之至範孰能  
昭宣令問若斯之盛哉彼蒼不忱殲我眉壽春秋若干載

初元年月日遘疾終於洛州某里之私第嗚呼哀哉夫人  
令儀有穆惠問無喧敦雅志於詩書婉嫺情於琴瑟若乃  
姆師酒食之議女工纂組之繁莫不總制清衷宏宣懿則  
茂蘋蘩之雅訓協沼沚之芳猷雖古稱敬姜詩云淑女論  
容比德殆無以過穠華不居私局永閼嗣子某等悲摧藥  
棘思結寒泉永惟同穴之儀仰遵歸祔之典以大周天授  
二年二月日朔遷祔於袁州府君之舊塋禮也合葬非古  
奉周公之儀墓而爲墳宗仲尼之訓嗚呼鴛鴦之樹眇泣  
於松楸鼓吹之山緬然於邱壠原陵何代銘誌無文有哀

黃鳥之詩遂勒青鳥之兆銘曰

詩云淑女君子好求懿哉令德嘉儀聿修溫容玉映峻節  
松楸妙心彤史潔志元猷昭宣壺則惠穆蘋洲共伯早逝  
貞姜獨留熒居蓬首哀深柏舟彼蒼不憇此夜長幽懷南  
風之吹棘想北隴以同邱青春兮白日獨昭昭以悠悠

上殤高氏墓誌銘

維唐垂拱二年太歲景戌七月二十日殤子高氏卒嗚呼  
哀哉含瓊敷而不玉實者有矣夫我觀顥元機化出入天  
壽之數榮落之原皆一受而不易者也悲夫古人之仁懿



中庸不幸短命今復見之於高子矣高子渤海蓆人也黃  
州府君之幼孫宛邱府君之叔子生而岐嶷實覃實華越  
在襁褓神明滋茂童蒙淵敏光潤玉顏八歲始教方書受  
甲子已知孝悌之道詩禮之規宛邱府君鍾愛之他日嘗  
趨庭與諸兒戲神情涵泳綽然如鴻雛鵠子有青雲之意  
也府君美之曰能光我家者此兒十五通左氏春秋及尚  
書飛騫之志日新宏大矣不幸享年十七遇暴疾而夭嗚  
呼哀哉宛邱府君感慟哀過於禮曰不恨爾壽之不長惜  
爾器之不彰夫何苗育今也則亡嗚呼吾將老矣爾遠何

哉其年七月殯於家園日月云徂六載於茲矣天授二年  
龍集辛卯府君方大崇元域以安先兆諸子之柩皆祔焉  
其年二月癸卯朔十八日庚申啟殯歸瘞於大塋禮也銘  
曰

來不可遏去不可止唯死與生由生以死於戲殤子噫何  
往矣傷慈父之肝情獨冥冥而長已死而有知可也若其  
無知悲爾

唐陳州宛邱縣令高府君夫人河南宇文氏墓誌

銘

夫人諱某河南郡人也昔吾君夏后氏之子霸有幽都皇  
運北興鼎圖南起開寶符而帝天下撫璿璣而王中國則  
後周之受命武帝之雲孫夫人四代祖也曾祖某失周子  
之封亡山陽之國雖存天子之允已類咸陽布衣植德早  
天祖某隋朝官澧州澧陽縣令父某龍州司法皆承家席  
寵代有令名夫人賁穠華襲繁祉崇徽惠穆秀色茗榮自  
於幼年有令儀也十四適於高府君夫其溫慈惠和信肅  
修穆行有法度動有禮經嚴恪以理家人憫憇以和君子  
則已含乎光大矣若乃宗廟哀敬仁孝也娣姒祗和謙順

也蠲潔酒食婦儀也黼黻元黃女工也宏此四德而務六  
親聲悅以文之雜佩以發之猗可以作範母儀昭宣壺則  
矣至於訓子以睦教女以順愛下以慈與人以讓外以贊  
府君之德內以光中饋之教皆曰聞其進不見其退也嗚  
呼仁而不壽生也永終永淳元年五月遇疾終於宛邱縣  
之官舍時年二十七嗚呼哀哉高府君尋以公事罷職山  
塋未卜旌旐來歸府君思北海之魂留東園而殯日月遂  
往九歲於茲府君方崇樹先塋增封舊域以大周天授二  
年太歲辛卯二月癸卯啟殯於東園遷祔於洛州某原禮

也哀哉夫人雅有高行終而不忘以爲厚葬非禮也是以  
珠玉不飾塋瓦是藏高府君聿遵其志率以薄葬於戲非  
古之明德淑女金玉其光何以躋之吾忝門閭之賓覩其  
家道矣雍穆懿鑠實有清風故敘之而未克德也銘曰  
天天桃李有華兮灼灼淑人宜家兮修睦婦道不譁兮窈  
窕嬪儀孔嘉兮榮采之方茂而云亡兮咨嗟

故宣議郎騎都尉行曹州離狐縣丞高府君墓誌

銘

君諱某字某某其先渤海椿人也因仕居洛今爲陽翟人昔

赭鞭乘運襲炎帝之宗蒼兕應期承太公之允崇勛霸業  
光烈猶存曾祖某北齊太子中舍人贈冀州刺史青宮近  
侍光寵朝班早蓋追榮恩崇國禮祖欽仁隋左親衛大都  
督檢校祕書郎帶七尺劍始遊天子之階持三寸筆終入  
芸香之閣父相唐江州潯陽縣令舒州懷寧縣令絃歌之  
化身不下堂神明之威蝗猶避境君即懷寧府君之長子  
也黃河一直青松萬仞性惟仁孝行實溫恭文義必以潤  
身名節由其徇物唐龍朔元年有制舉忠鯁君對策及第  
試永州湘源縣尉位卑黃綬志在清規秩滿以常調補鳳

州黃花縣丞梁竦長懷尚勞州縣桓譚不樂空負琴書又  
轉易州遂城縣丞以管輅之材從趙典之任古人斯在君  
子居之大周革命任曹州離狐縣丞而春秋已高日月方  
出武盡美矣不得夷齊之臣文哉郁乎自邈夏商之道於  
是因階秩滿告老歸閑閑郊扉於南野習巖居於東澗詩  
書琴酒以觀先達之風山水邱園將爲遺老之賞天授二  
年歲在單閼七月二十二日考終厥命卒於陸渾縣明高  
之山莊時年七十有二嗚呼哀哉君雅尚節義素履元亨  
懷古人之遠圖慕先賢之遺烈以爲桓雕石擲非則於禮

經墨翟桐棺實宜於聖典遺令薄葬務取隨時即以其年  
十月日葬於北邙山平樂之原禮也嗣子思恭孝思罔極  
喪制過哀思封樹而緬懷恐東西而不志白楸爲槨奚遵  
古葬之儀丹漆題封即表永年之記銘曰

泱泱大風其太公兮穆穆君子紹厥宗兮忠鯁察廉仕漢  
宮兮才高位卑考永終兮哀哀孤子號蒼穹兮歸葬平陵  
松柏桐兮

堂弟孜墓誌銘

君諱孜字無怠其先陳國人也六代祖太樂梁大同中爲



本郡大司馬生五代祖方慶屬梁亂始居新城郡武東山  
生高祖湯爲郡主簿生曾祖通早卒通生皇祖辯少習儒  
學然以豪英剛烈著聞是以名節爲州國所服皇祖生考  
元爽保植先人茂德降生於君君幼孤天資雄植英秀獨  
邁性嚴簡而尚倜儻之奇愛廉貞而不拘介獨之操始通  
詩禮畧觀史傳即懷軌物之標希曠代之業故言不宿諾  
行不苟從率身克己服道崇德閨門穆穆如也鄉黨恂恂  
如也至乃雄以濟義勇以存仁貞以立事毅以守節獨斷  
於心每若由己實爲時輩所高而莫敢與倫也是以鄉里

長幼望風而靡邦國賢豪聞名而悅服方謂拂羽喬木緬  
昇高雲而遭命大過棟撓而殞嗚呼天咎予乎時年三十  
五是歲龍集癸巳有周天授二年秋七月卜兆不吉權殯  
於真諦寺之北園始以今甲午歲獻春一月己酉朔二十  
五日己酉定於石溪山之北岡陪考墳也君家世墳壠在  
武東山昭穆崇封松柏列盛至君考遺令獨愛石溪之岡  
故君從先志祔葬於此嗚呼哀哉始君伯父海內之文人  
也含純剛之德有高代之行每見君歎曰吾家代雖儒術  
傳嗣然豪英雄秀濟濟不泯常懼後來光烈不象先風每

一見爾慰吾家道實謂君有逸羣之骨拔俗之標超山越  
壑可以駿邁也豈其天絕喪茲良圖嗚呼其元命歟遭命  
歟天不忱歟道固謬歟大圓蒼蒼大方茫茫賢聖同此爾  
之何傷古人有言珠玉而瘞是暴骸於中原況吾家道尚  
儉名訓未墜封樹之禮吾敢過焉是用錫爾瓦木之器塗  
芻之靈堯舜之典忠孝之經昭示後代以安爾形銘曰

我祖之蕤蕤兮邈於陳緬遙裔兮此江濱五代崇光兮至  
夫君徽烈英曜兮始蓋蓋何意嚴霜兮降青春玉樹摧落  
兮成黃塵南山無隙兮永幽淪悠悠昭代兮卜爾辰吾慟

感傷兮號蒼旻問之著策兮立茲墳乃言千載兮衣冠來  
臻黃頭之子白服人嗟爾黃頭兮勿傷神

周故內供奉學士懷州河內縣尉陳君石人銘

君諱該字彥表縣州顯武人也其先自潁川遷蜀矣曾祖  
寄祖曾考永貴皆養高不仕君少好學能屬文上元元年  
州貢進士對策高第釋褐授將仕郎其明年制勅天下文  
儒司屬少卿楊守訥薦君應詞殫文律對策高第勅授茂  
州石泉縣主簿開耀元年制舉太子舍人司議郎大府少  
卿元知讓應制薦君於朝堂對策高第勅授隆州蒼溪縣

主簿垂拱四年又應制學綜古今對策高第勅授懷州河  
內縣尉凡歷所職皆以清廉仁愛著聞有周革命天授三  
年恩勅自河內追入閤供奉居末期不幸遇疾於神都積  
善坊考終厥命年六十三歸葬於豆圖山之陽原禮也嗚  
呼哀哉古人有云飾顏夷之行不逢青雲之士而聲名磨  
滅者有之矣嗚呼我陳君敦懿元默潔清溫良馴道執志  
好學博古恂恂焉行高職卑不改其操學優祿薄不怨於  
天四舉有道三歷下位宴如也非諄諄淑人其誰能涅此  
而不渝哉夫知命可謂君子矣好學可謂爲文矣丹書不

藏於勲府青史不昭於方冊於戲一絕故老之口孰知夫子之賢哉吾與君族人也服美其德尚矣昔子雲稱李元常璩敘令伯皆沒而不朽後代稱之斯非若人之徒歟吾豈默而無述其銘曰

閭閻君子好斯文兮縟藻輦章潛卿雲兮棲遲下位允升聞兮金署玉堂見吾君兮鸞階鴻漸期紫氛兮鍾鳴漏盡竟蘭焚兮儒行墨節將何云兮恭承遺言立石人兮金刻丹書記歲辰兮青龍甲午銘茲墳兮

館陶郭公姬薛氏墓誌銘

姬人姓薛氏本東明國王金氏之允也昔金王有愛子別  
食於薛因爲姓焉世不與金氏爲姻其高曾皆金王貴臣  
大人也父永冲有唐高宗時與金仁問歸國帝疇厥庸拜  
左武衛大將軍姬人幼有玉色發於穠華若彩雲朝升微  
月宵映也故家人美之少號仙子聞羸臺有孔雀鳳凰之  
事瑤情悅之年十五大將軍薨遂翦髮出家將學金仙之  
道而見寶手菩薩靜心六年青蓮不至乃謠曰化雲心兮  
思淑真洞寂滅兮不見人瑤草芳兮思蓋蓋將柰何兮青  
春遂返初服而歸我郭公郭公豪蕩而好奇者也雜佩以

迎之寶瑟以友之其相得如青鳥翡翠之婉孌矣華繁艷  
歌樂極悲來以長壽二年太歲癸巳二月十七日遇暴疾  
而卒於通泉縣之官舍嗚呼哀哉郭公恍然猶若未亡也  
寶珠以含之錦衾而舉之故國途遙言歸未迨留殯於縣  
之惠普寺之南園不忘真也銘曰

高邱之白雲兮願一見之何期哀淑人之永逝感紺園之  
春時願作青鳥長比翼魂魄歸來遊故國

我府君有周居士文林郎陳公墓誌銘

公諱元敬字某其先陳國人也五世祖太樂梁大同中爲



新城郡司馬生高祖方慶方慶好道得墨子五行祕書白  
虎七變法遂隱於郡武東山生曾祖湯湯爲郡主簿湯生  
祖通通早卒生皇考辯爲郡豪傑公河目海口鸞頷虎頭  
性英雄而志尚元默羣書祕學無所不覽年弱冠早爲州  
閭所服耆老童幼見之若大賓二十二鄉貢明經擢第拜  
文林郎屬憂艱不仕潛道育德穆其清風邦人馴致如衆  
鳥之從鳳也時有決訟不取州郡之命而信公之言四方  
豪傑望風景附朝廷聞名或以君爲西南大豪不知深慈  
恭懿敬讓以得也州將縣長時或陳議青龍癸未唐厯云

微公乃山棲絕穀放息人事餌雲母以怡其神居十八年  
元圖天象無所不達嘗宴坐謂其嗣子子昂曰吾幽觀大  
運賢聖生有萌芽時發乃茂不可以智力圖也氣同萬里  
而合不同造膝而悖古之合者百無一焉嗚呼昔堯與舜  
合舜與禹合天下得之四百餘年湯與伊尹合天下歸之  
五百年文王與太公合天下順之四百年幽厲板蕩天紀  
亂也賢聖不相逢老聃仲尼淪溺溷世不能自昌故有國  
者享年不永彌四百餘年戰國如糜至於赤龍赤龍之興  
四百年天紀復亂夷胡奔突賢聖淪亡至於今四百年矣

天意其將周復乎於戲吾老矣汝其志之太歲己亥享年七十有四七月七日己未隱化於私館孤子子昂愚昧鞠然在疚不知所從乃祇馴聖人卜宅之義是歲十月己酉遂開拭舊塋奉寧神於此山石佛谷之中岡也銘曰

賢者避地邈其往兮鳳兮鳳兮誰能象兮嗚呼我君懷寶不試孰知其深廣兮悠悠白雲自怡養兮大運不齊賢聖罔象兮南山四君不遭漢天子固亦商邱之遺壤兮

唐水衡監丞李府君墓誌銘

君諱某字某趙國人也乃昔嬴楚睽孤豪傑雲起廣武君

負霸王之畧爲成安之師實欲北興帝基南面稱創雄圖  
未展大運陵積傳云有明德當代不顯其後必有昌者自  
武至君二十四代矣公侯寶玉刻鼎銘鐘紛綸歲蕤代濟  
不泯六代祖孝伯後魏北部尚書秦州都督宣城公魏之  
名臣載在青史曾祖某後周陝州芮城縣令祖某屬隋運  
板蕩君子道消遜言遁時不顯於仕拜儒林郎父某唐隆  
州蒼溪縣丞襄州荊山縣尉有高才而無貴仕君鍾常山  
之氣炳漳水之靈少尚名節躬行仁義始入太學以精理  
見知未幾進士高第拜白水縣尉尋轉雲陽尉屈青雲之

資從黃綬之任雖吏道迫屑而遐情眇然秩滿調補洛陽尉盤根利器尹守拭目遷懷州司法祿不徇榮位以行道雅尚貞遜與衆超少合泊上聞對策甲科授益州大都督府錄事參軍滿歲擢授水衡監丞君所居清澹仁惠爲政識真之士以公輔許之而好學篤道介如石焉故位不充量搢紳高其才烈士伏其義竟不能驤首雲路長鳴天衢知與不知咸皆共歎有餘恨也而君浩然冥順獨與化遊方將幽採元微精覈通變天命不祐春秋若干遘疾終於官某歲某月安厝於某所禮也嗚呼古所謂歿而不朽者

有矣夫遺言餘旨粲然可觀有子曰某痛門風之將泯懼  
代業之罔傳乃刊石紀德銘旌之曰

常山之靈和氏之英世有明德鍾此令名黃黻不貴拱璧  
爲輕仕以宏道祿匪徇榮高志厲雲思機入冥嗚呼天乎  
殲我國楨

禡牙文

萬歲通天二年三月朔日清邊道大總管建安郡王某敢  
以牲牢告軍牙之神蓋先王作兵以討有罪奸慝竊命戎  
夷不龔則必肆諸市朝大戮原野我皇周子育萬國寵綏

百蠻青雲干呂白環入貢久有年矣契丹凶羯敢亂天常  
乃蜂聚九山豕食遼塞宴安鴆毒作爲攬槍天厭其凶國  
用致討皇帝命我肅將王誅今大軍已集吉辰協應旄頭  
首建羽旄前列夷貊咸威將士聽誓方俟天休命爲人殄  
災惟爾有神尚殲乃醜召太一會雷公翼白虎乘青龍星  
流彗掃永清朔裔使兵不血刃戎夏來同以昭我天子之  
德允乃神之功豈非正直聰明哉無縱大讎以作神羞急  
急如律令

崇海文

萬歲通天二年月日清邊軍海運度支大使虞部郎中王  
元珪敢以牲酒馳獻海王之神神之聽之我國家昭列象  
胥惠養戎貊百蠻率職萬方攸同鮮卑猖狂忘道悖亂人  
棄不保王師用征故有渡遼諸軍橫海之將天子命我羸  
糧景從今旌甲雲屯樓船霧集且欲浮碣石凌方壺襲朔  
裔卽幽都而漲海無倪雲濤洄涌胡山遠島鴻洞天波惟  
爾有神肅恭令典導鷁首騎鯨魚呵風伯遏天吳使蒼兕  
不驚皇師允濟攘慝勦虐安人定災蒼蒼羣生非神何賴  
無昏汨亂流以作神羞急急如律令



國殤文 并序

丁酉歲三月庚辰前將軍尚書王孝傑敗王師於榆關峽  
口吾哀之故有此作

天未悔禍兮熾此山戎虐老昏幼兮人罹其窮帝用震怒  
兮言翦其凶出金虎兮曜天鋒掃宇宙之甲馳燕薊之衝  
何士馬之沸渭若雲海之洶洶荆吳少年韓魏勁卒戈矛  
如林白羽若月且欲蹈烏丸之壘刈赤山之旗聯青邱之  
繳封黃龍之屍凶胡猖獗姦險是憑蛇伏泥滓蟻鬪邱陵  
哀我將之仡勇兮無算畧以是膺陷天井之死地屬雲騎

以相騰短兵既接長戟亦合星流颺馳樹離

一作雜

山沓智

無所施其巧勇不能制其怯頓金鼓之雄威淪輿尸之敗  
業嗚呼哀哉矢石既盡白日積主將已死士卒哀徒手奮  
呼誰救哉含憤抗怒志未迴殺氣凝兮蒼雲暮虎豹慄兮  
殤魂懼殤魂懼兮可柰何恨非其死兮棄山阿血流骨積  
殪荒楚思歸道遠不得語降不戮兮北不誅歿不賞兮功  
不圖豈力士之未徇誠師律之見孤重曰壯士雖死精魂  
用凶醜爾讎不可縱我聞強死能厲災古有結草抗杜回  
苟前失之未遠儻冥讎之在哉嗚呼魂兮念歸來

弔塞上翁文

居延海南四百餘里有古城焉土人云是塞上翁城今爲  
戍其基局趾跡蓋數千年也丙戌歲兮我征匈奴恭聞北  
叟託國此都子尚于叟日月遐邁及今來思實獲心契欣  
問于叟何德其愚僻居幽漠浩與代殊忘情逸馬胡寧而  
知福謝於鄰人何達而不淑丁男旣存君子知復人以爲  
極也伊懷茲土旣板且築局禁天崇墉隍雲矗今則荒穢  
代亦不毓其故何哉賢叟之德登叟之堂天道何遠而茲  
理茫茫人代自故兮邱壠崩荒魂魄何獨不歸故鄉叟乎

叟乎我心之傷

祭孫府君文

維年月日謹以牲酒之奠致祭故延俊府折衝燕然軍孫  
府君之靈惟君少馳英武早效成功聲雄塞上名重關中  
懔稜威於敵國存大節於家風旣揮金而退老方餌藥於  
仙童何昊天之不弔隨大化以長終白馬故人青鳥送往  
素車永訣黃墟誰賞醕酒盈觴魂兮尚饗

爲建安王祭苗君文

維某年月日朔方道大總管建安郡王攸宜以酒饌之奠

祭故壯武將軍左玉鈐衛中候左三軍營主苗君之靈君  
忠勇兼資戎麾夙濟烏丸作逆赤羽從軍方且任君先鋒  
仍馳後勁刈鮮卑之壘摧冒頓之師執馘獻俘歸受國賞  
何圖大勛未立隨命先凋永懷咨嗟情用兼慟故命酒奠  
告爾殤魂君其有靈歆茲薄酌嗚呼尚饗

祭黃州高府君文

維年月日朔孫女夫某等謹以清酌庶羞之奠敢昭告於  
故黃州高府君之靈惟府君含德元亨保和光大才堪濟  
代而運屬承平器允登臺而命鍾流落有瑚璉之寶無廊

廟之資豈圖大位不躋幽靈永昧尊儀潛翳三十餘年元  
殞既開黃腸已古今青烏改卜丹旄來歸窀穸即期幽明  
永訣某等忝承嘉惠奉事門闌興言追慕實增感咽竊惟  
精意以享黍稷非馨敢陳薄醑以獻明靈嗚呼哀哉伏惟  
尚饗

祭外姑宇文夫人文

維年月日朔女夫某謹以清酌嘉蔬之奠奉祭於故高氏  
河南宇文夫人之靈恭聞夫人有清穆之德皓潔之行淳  
懿肅恭內外仰則而遺風素範蕙敷蘭滋用能惠心光孚

氤氲沼沚崇嚴壺訓芬郁母儀中饋柔嘉娣姒有則豈圖  
慈顏幽翳於今十年毫末已拱尊靈廓然今吉辰協應幽  
殯方開容象如在器質已灰改卜禮典宅兆方遷山園旣  
列祖載行焉哀子號咷女也蟬媛終天永訣泣血流漣某  
謬承嘉惠預叨姻戚生事早睽送終空積竊聞精意以享  
黍稷非馨敢陳薄酌以獻明靈伏惟夫人明神尚饗

祭韋府君文

維年月日左拾遺陳子昂謹以少牢清酌之奠致祭故人  
臨海韋君之靈惟君孝友自天忠義由己有經世之畧懷

軌物之量甘心苦節風雨不改常欲窮則獨善其身達則兼濟天下感激遐詠邈然青雲何期良策未從大運奄忽嗚呼哀哉昔君夢奠之時值余實在叢棘獄戶咫尺邈若山河話言空存白馬不弔迨天網既開而宿草成列言笑無由夢寐不接永言感慟何時可忘今旌旆言歸關河方遠興言永訣今古長辭鄧攸無子天道何知洛陽舊陌拱木猶存京兆新阡孤松已植已矣韋生云何及矣大運之往賢聖同塵嗚呼哀哉伏維尚饗

祭率府孫錄事文



維年月日朔某等謹以云云古人歎息者恨有志不遂如  
吾子良圖方興青雲自致何天道之微昧而仁德之攸孤  
忽中年而顛沛從天運而長徂惟君仁孝自天忠義由已  
誠不謝於昔人實有高於烈士然而人知信而必果有不  
識於中庸君不慙於貞純乃洗心於名理元常旣沒墨妙  
不傳君之逸翰曠代同仙豈圖此妙未極中道而息懷衆  
寶而未攄永幽泉而掩魄嗚呼哀哉平生知己疇昔周旋  
我之數子君之百年相視而笑宛然昨日交臂而悲今焉  
已失人代如此天道固然所恨君者枉天當年嗣子孤藐

貧窶聯翩無父何恃有母惻焉嗚呼孫子山濤尚在嵇紹  
不孤君其知我無恨泉途嗚呼哀哉尚饗